



Bosnia and Herzegovina
Federation of Bosnia and Herzegovina

CANTON SARAJEVO
Ministry for Education

Broj: 11-04/02-34-51929-23/24

Sarajevo, 04.03.2025. godine

SKUPŠTINA KANTONA SARAJEVO

n/r Elvedin Okerić, Predsjedavajući Skupštine Kantona Sarajevo

Predmet: Odgovor na zastupničku inicijativu, *dostavlja se*

ZASTUPNIČKA INICIJATIVA:

Zastupnica u Skupštini Kantona Sarajevo, Marijela Hašimbegović je u skladu sa članom 231. stav 1. Poslovnika Skupštine Kantona Sarajevo („Službene novine Kantona Sarajevo“ broj: 15/13, 47/13, 47/15, 48/16, 9/20, 14/20, 16/22 i 17/22-Ispravka) na 17. radnoj sjednici Skupštine Kantona Sarajevo uputila zastupničku inicijativu sljedećeg sadržaja:

„Upućujem inicijativu Školskom odboru JU Elektrotehnička škola za energetiku radi očitovanja svih članova pojedinačno o poduzetim aktivnostima koja se tiču prekršaja ustanovljenih inspekcijskim nalazima, zastupničkog pitanja Skupštine KS kao zakonodavnog organa i Inicijativu upućenu 15.11.2023. godine, akt broj: 03-05-04-13031/24 upućen od strane Ministarstva pravde i uprave od 25.03.2024. godine radi postupanja po Inicijativi od 26.02.2024. godine. Prema saznanjima koje imam prekršaji i izrečene kazne nastavljaju se nizati, a da niko od nadležnih ništa ne preduzima, što šteti ugledu njenih učenika, uposlenika, ali i Kantona Sarajevo, kao osnivača Škole. Zato Vas pozivam na odgovornost i nepristrasnost uz hitnu reakciju na postupke kršenja zakona koje mora biti sankcionisano. Svaka administrativna šutnja je dokaz podrške i zataškavanja cijelog slučaja. Izostala je reakcija i Ministarstva odgoja i obrazovanja na Inicijativu od 15.11.2023. godine, te posljednja inicijativa od 26.02.2024. godine. Svakako očekujem odgovor o poduzetim koracima u sprovedbi i zaštiti zakona u predmetnoj problematici u što hitnijem roku. U skladu sa nadležnostima Ureda za borbu protiv korupcije i upravljanje kvalitetom KS očekujem da se aktivno uključi u sprovedbu zaštite zakona koji se u ovom slučaju grubo krši.

Obrazloženje:

Nakon uvida u Izvještaj dobiven od Kantonalne uprave za inspekcijske poslove KS dana 26.02.2024. godine, pokrenula sam inicijativu koja ukazuje na kršenje zakona direktora Elektrotehničke škole za energetiku, a radi utvrđenih prekršaja koji se ponavljaju i predstavljaju osnov za njegovo razrješenje.



Obzirom da nisam dobila nikakav odgovor od Ministarstva odgoja i obrazovanja, niti od Školskog odbora Škole, uputila sam Urgenciju na Inicijativu dana 29.04.2024. godine i reakcija je opet izostala. Na ovu Urgenciju očitovao se Ured za borbu protiv korupcije i upravljanje kvalitetom KS koji navodi da je resorno Ministarstvo odgovorno za sprovođenje zakona, kao i sam školski odbor, međutim kao ni na samu Inicijativu, niti na Urgenciju Ministarstvo za odgoj i obrazovanje i Školski odbor Škole ne odgovaraju na ovu Inicijativu istu upućujem na više adresa radi svjesnog neodgovaranja tj. nereagovanja kako Školskog odbora, tako i resornog ministarstva. Navedena situacija traje već godinama i očekujem da će učešće OSCE-a biti od velikog značaja. Uz zahvalnost za odgovor na sve prethodne Inicijative vezane za ovu problematiku Ministarstvu pravde i uprave upućujem Inicijativu radi nastavka djelovanja iz njihovog djelokurga.“

ODGOVOR:

U vezi sa podnesenom Inicijativom sa 17. radne sjednice Skupštine Kantona Sarajevo zastupnice u Skupštini Kantona Sarajevo, Marijele Hašimbegović, Ministarstvo za odgoj i obrazovanje Kantona Sarajevo podsjeća da je zastupnici, Marijeli Hašimbegović uputilo odgovor broj: 11-04/02-34-46892-1/23 od 15.12.2023. godine kojim je pojasnilo zakonsku proceduru izbora direktora JU Elektrotehnička škola za energetiku Fikreta Radončića. Također, Ministarstvo za odgoj i obrazovanje je na zahtjev Ureda za borbu protiv korupcije i upravljanje kvalitetom, svojim aktom broj: 11-04/02-03-36381-1/23 od 18.09.2023. godine pomenutom Uredu dostavilo pojašnjenje postupka imenovanja direktora JU Elektrotehnička škola za energetiku Radončić Fikreta i da Ured Ministarstvo u vezi sa ovim pitanjem nije obavijestio o bilo kakvim utvrđenim nepravilnostima.

Kada se radi o zastupničkoj inicijativi zastupnice u Skupštini Kantona Sarajevo Marijele Hašimbegović od 15.11.2023. godine Ministarstvo primjećuje da se istom Ministarstvo poziva da se žurno uključi u aktivnosti uspostavljanja neophodne komunikacije i saradnje između direktora i radnika JU Elektrotehnička škola za energetiku i rješavanje problematike narušenih međuljudskih odnosa i te se problematizira transparentnost konkursne procedure za imenovanje direktora Škole. Inicijativom od 26.02.2024. godine traži se uvid u zakonitost obavljanja funkcije direktora JU Elektrotehnička škola za energetiku, Radončić Fikreta, a na osnovu izvještaja Kantonalne uprave za inspeksijske poslove. Podnesenom inicijativom se od Ministarstva traži pokretanje postupka prijevremenog razrješenja Fikreta Radončića sa funkcije direktora JU Elektrotehnička škola za energetiku.

U vezi sa navedenim, Ministarstvo skreće pažnju na činjenicu da Kantonalna uprava za inspeksijske poslove ima nadležnosti, ukoliko utvrdi nepravilnosti u radu organa Škole, da posebnim rješenjem naloži otklanjanje utvrđenih nepravilnosti. Istovremeno, nadležna inspekcija samostalno cijeni i postojanje osnova za izricanje prekršajnih sankcija, a Ministarstvo za odgoj i obrazovanje nema nadležnost uplitati se u rad i postupanje inspeksijskih organa. Međutim, Ministarstvo cijeni da izricanje prekršajnog naloga, samo po sebi, ne predstavlja dokaz o konačnoj odgovornosti direktora bilo koje Škole, a posebno u slučaju podnošenja zahtjeva za sudsko odlučivanje u situaciji izricanja prekršajnog naloga. S tim u vezi, Ministarstvo ističe da je u izjašnjenju direktora JU Elektrotehnička škola za energetiku broj: 03-34-570/2024 od 19.04.2024. godine ukazano da su neke od izrečenih kazni od nadležnih inspeksijskih organa izrečene Školi 30.05.2023. godine zbog neizvršavanja uplate u zadatom roku, a što je bilo direktna posljedica činjenice da je direktor Škole u naznačenom periodu bio na bolničkom liječenju. Međutim, u navedenom dopisu navodi se da je Općinski sud ukinuo predloženu kaznu. Također u dopisu od 19.04.2024. godine se navodi da je imenovanje Tima za primanje i rješavanje pritužbi radnika urađeno u skladu sa tada važećim Kolektivnim ugovorom za



oblast srednjeg obrazovanja, a da je naknadnim izmjenama propisano da poslove primanja i rješavanja pritužbi radnika obavlja jedno lice.

U vezi sa zahtjevom da se pribave pojedinačna izjašnjenja članova Školskog odbora u odnosu na postojanje elemenata za prijevremeno razrješenje direktora JU Elektrotehnička škola za energetiku, Ministarstvo skreće pažnju na činjenicu da Školski odbor postupa i svoje odluke donosi kao organ Škole.

Članom 14. Pravilnika o izboru, razrješenju, nadležnostima i načinu rada školskog odbora osnovne škole, srednje škole, srednjoškolskog i školskog centra na području Kantona Sarajevo („Službene novine Kantona Sarajevo“ broj: 46/24, 3/25) propisano je:

„Član 14.

(Način rada školskog odbora)

(1) Obavljanje dužnosti člana školskog odbora je dobrovoljno i bez naknade.

(2) Način rada školskog odbora regulira se poslovníkom o radu.

(3) Poslovník iz stava (2) ovog člana donosi školski odbor najkasnije 30 dana od održavanja prvog sastanka.

(4) Sve odluke školskog odbora donose se na sjednicama odbora na način da se o njima glasa javno ili tajno što se preciznije uređuje Poslovníkom o radu.

(5) Odluke školskog odbora valjane su ako za njih glasa većina od ukupnog broja članova.

(6) Ministarstvo može poništiti, staviti van snage, odnosno obustaviti od izvršenja odluku školskog odbora, ako je protivna zakonu, podzakonskim i provedbenim aktima i pravilima škole, i o tome obavijestiti u roku od sedam dana od dana donošenja odluke, direktora i školski odbor.

(7) Direktor škole je obavezan odmah obavijestiti Ministarstvo o odluci školskog odbora za koju smatra da je suprotna zakonu, odnosno koja može nanijeti materijalnu štetu školi.

(8) Odluke, zaključci i stavovi školskog odbora se objavljuju javno, putem oglasne ploče, odmah, a najkasnije tri dana nakon okončanja sjednice na kojoj su doneseni. U slučaju da je školski odbor odluku, odnosno zaključak, donio na pisani zahtjev trećeg lica, iste je obavezan dostaviti u pisanoj formi podnosiocu zahtjeva.

(9) Član školskog odbora koji se ne slaže sa donesenom odlukom može tražiti da se u zapisnik unese njegovo izdvojeno mišljenje.

(10) U slučaju da članovi školskog odbora prilikom donošenja odluka (glasanja), koje su neophodne za funkcionisanje škole, odnosno kojima se onemogućava rad škole, dva puta glasaju 2:2 ili da prilikom glasanja ne postoji većina od ukupnog broja glasova članova, školski odbor je dužan dostaviti Ministarstvu obrazloženje o nedonošenju navedenih odluka sa dokazima o postupanju po istom.

(11) Članovi školskog odbora mogu djelovati samo kao kolektivni organ i nemaju nadležnost za donošenje odluka van sjednica školskog odbora.

(12) U slučaju neopravdanog nedolaska člana školskog odbora na najmanje tri uzastopne sjednice, na kojima se razmatra ista tačka dnevnog reda, školski odbor pokreće inicijativu za smjenu tog člana“.


Također, Ministarstvo cijeni da u izvršavanju svojih nadležnosti Školski odbor mora uživati određeni stepen autonomije u skladu sa zakonom, odnosno da mora biti u mogućnosti da samostalno cijeni da li postoje osnovi za prijevremeno razrješenje direktora Škole. Istovremeno, Školski odbor snosi odgovornost za zakonito izvršavanje poslova iz okvira utvrđene nadležnosti. U tom smislu,



zahtijevanje pojedinačnog izjašnjenja članova Školskog odbora moglo bi narušiti princip zakonske autonomije u postupanju Školskog odbora.

Na kraju, Ministarstvo želi istaknuti činjenicu da kvalitet međuljudskih odnosa u Školi ne može biti predmet postupanja Ministarstva za odgoj i obrazovanje. Nesporna je činjenica da radnici Škole na raspolaganju imaju zakonske instrumente za zaštitu svojih prava u slučaju kada procijene da su ista narušena.

S poštovanjem,



Dostaviti:

1. Naslovu,
2. Evidenciji,
3. a/a.

